

TEZAU LITURGIC
14 MARTIE

ACATISTUL
SF. CUVIOS
BENEDICT
DE LA NURSIA



MOSCOVA, 2000



Акафист

преподобному

Венедикту Нурсийскому

Кондак 1

Возбранный отче преподобне, тобою бо Христос яко светом неугасимым мир просвети и расточи тьмы вражия. Таковому о тебе смотрению дивящися, хвалим тя, яко заступника от всяких бед, благодарственно зовуще: Радуйся, Венедикте, Нурсийский чудотворче.

Икос 1

Ангельский образ жития возлюбивый от юности, в место пусто бежал еси суетнаго мира, поправый вся прелести его и вперивый к горнему ум твой, Сидам безплотным собеседник явивыйся; с нимиже и мы воспоем ти:

Радуйся, Христу распеньшемуся последовавый.

Радуйся, умертвивыйся миру, Богу единому жити восхотевый.

Радуйся, слез теченьми пустыню оросивый.

Радуйся, восхождением сердца победивый
лукавыя.

Радуйся, славу мира сего возненавидевый.

Радуйся, пощением яко Ангел показавыйся.

Радуйся, целомудрия венцем от юности
увязанный.

Радуйся, яко крин чистоты прозябший.

Радуйся, на камени дом свой поставивый.

Радуйся, бисер многоценный Царствия
обретший.

Радуйся, смирение Христово восприявый.

Радуйся, древо жития райскаго явивыйся.

Радуйся, Венедикте, Нурсийский чудотворче.

Кондак 2

Видев тя, яко столпа богоразумия, древний
змей покусися сокрушити тя, но ты, многими
подвиги плоть умертвивый, наказал еси ны пети
с упованием: Аллилуиа.

Икос 2

Разума горняго преисполнен и благодатию,
аки ризою одеаяся в немощи, собрал еси
множество пети Господа. С нимиже и мы, яко
звезду всемирну возсиявшу на Церковной
тверди, восхвалим тя, поюще:

Радуйся, нечестия державу разоривый.

Радуйся, смрадную лесть бесовскую
прогнавый.

Радуйся, даров духовных исполненный от
младости.

Радуйся, миро божественных вещаний
источивый.

Радуйся, крест Христов восприемый.

Радуйся, крепостию Его опоясанный.

Радуйся, стадо твое от волков мысленных
спасающий.

Радуйся, поющих Господа наставниче
премудрый.

Радуйся, кротости кладезе глубокий.

Радуйся, немощным помощниче предобрый.

Радуйся, Царствия Божия делателю верный.

Радуйся, недужных целителю независтный.
Радуйся, Венедикте, Нурсийский чудотворче.

Кондак 3

Силою вышнею, аки древле Илия дождь с небесе низвел еси и елей людем твоим умножил еси, показуя милосердие Божие простерто на ны и наставляя светло звати: Аллилуиа.

Икос 3

Имущаго силу духи темныя отгоняти, како достойно восхвалим тя, Венедикте, яко и одержимыя от бесов свободил еси и мертвыя воздвигнул еси. Тем же мы тя ублажаем, поюще:

Радуйся, идольския лести корнесекателю.

Радуйся, святаго благочестия насадителю.

Радуйся, мрак неведения отгнавый.

Радуйся, яко звезда златозарная просиявый.

Радуйся, многотерпения сосуде избранный.

Радуйся, милостию Божиею украшенный.

Радуйся, всякия суеты отметавыйся.

Радуйся, Богу весь соединивыйся.

Радуйся, нищелюбием украсивыйся.

Радуйся, недуги изцеляющий.

Радуйся, в печалех скорый помощниче.

Радуйся, в скорбех верный заступниче.

Радуйся, Венедикте, Нурсийский чудотворче.

Кондак 4

Буря мракобесия хотящая низвергнути тя,
досточудне, яко на горе жития святого стояща,
не возмогши противитися силе твоей —
сокрушися; мы же чюдящися таковой крепости,
хвалим тя, поюще: Аллилуиа.

Икос 4

Слышаще како высокою праведности
уподобился еси горним Силам, отче,
умножишася паки спасаемья окрест тя, темже
процвете аки крин пустыня. С нимиже и мы
дерзаем воспевати ти умиленно:

Радуйся, в светлую ризу безстрастия
оболкийся.

радуйся, на земли ангельское житие
поживый.

Радуйся, пречудне, пути спасения верно
наказавый.

Радуйся, силне, идолюбесие поправый.

Радуйся, меда сладчайши устом правило начертавый.

Радуйся, сердце твое, аки зеркало богомыслия явивый.

Радуйся, обитель Троице твой дух сотворивый.

Радуйся, в похвалу Господню ограду великую создавый.

Радуйся, провидче, проразумением украшенный.

Радуйся, преподобне, по воздуху в бедах сущих предваривый.

Радуйся, богомудре, тобою бо научаются вернии.

Радуйся, богоблаженне, тобою бо спасаются мнози.

Радуйся, Венедикте, Нурсийский чудотворче.

Кондак 5

Богоприемный сосуде, Христовой любви всю душу твою привязавый, направил еси ума твоего шествие к небесем и, аки Моисей, воду живу из земли безводней изведый; како не

воспоим Христа толику благодать ти даровавшего, зовуще со страхом: Аллилуиа.

Икос 5

Видяще тя, яко садителя чистоты, из суемудрия изведшаго тьмы спасаемых, чтуще любовь святую память твою, вопием ти сице:

Радуйся, паучины хитрословесныя растерзаяй.

Радуйся, страху Божию наставляяй.

Радуйся, Ангелов на небеси удививый.

Радуйся, бесов в преисподней устрашивый.

Радуйся, яко тобою мысленно плененные свободяются.

Радуйся, яко тобою сынове света услаждаются.

Радуйся, водою умиления напаяющий.

Радуйся, хлебы благодати подавающий.

Радуйся, столпе световиден благонравия.

Радуйся, Духа обителище светозарное.

Радуйся, вертограде цветов благоуханных.

Радуйся, раю плодов живоподательных.

Радуйся, Венедикте, Нурсийский чудотворче.

Кондак 6

Проповедание Христа распеншагося твоим житием утвердивый, явился еси молитвенник дерзновенный о душах наших, темже благочестно тя славим, поюще Богу: Аллилуиа.

Икос 6

Возсиявый в Церкви яко светило незаходимое, сокрушил еси, отче, идолюбесие всеусердно, виноград же мысленный Христу возделал еси. Никако разуму сотворенному достигнути величия жития твоего, токмо любовию дерзаем воспевати ти смиренно:

Радуйся, тьмы сокрушителю сильный.

Радуйся, света явителю верный.

Радуйся, отцев мысленная красото.

Радуйся, преподобных велие удобрение.

Радуйся, уз скорый разрешителю.

Радуйся, плачущих быстрый утешителю.

Радуйся, в бурных морях утишие.

радуйся, плавающих звездо пресветлая.

Радуйся, древо на истоках водных прозябшее.

Радуйся, корене молитвы благодатный.

Радуйся, имени Христова благовоние.

Радуйся, велений Его исполнение.

Радуйся, Венедикте, Нурсийский чудотворче.

Кондак 7

Хотяще нечестивии паки погубити тя, богоприятне, брашно предложиша ти ядоносное. Ты же врану подал еси бросити его далече; видяще твоего прозрения силу, со страхом поем Богу: Аллилуиа.

Икос 7

Новая тварь в тебе, отче, тайновидно показася, плоти превыше быв и яко Ангел на земли поживый девства пречуднаго прозябением, благочестивых тако пети возставляеши:

Радуйся, тьмы предстателя ярость низложивый.

Радуйся, Тотилму царя премудро научивый.

Радуйся, в пощении просиявый.

Радуйся, плоти мудрование умертвивый.

Радуйся, елей во чванце умноживый.

Радуйся, исцелений благодать стяжавый.

Радуйся, к животу горнему наставниче.

Радуйся, великия обители столпе.

Радуйся, миру умерший и со Христом спогребыйся.

Радуйся, ризу спасения дивно исткавый.

Радуйся, воздержания и кротости мерило.

Радуйся, чистоты евангельския образе.

Радуйся, Венедикте, Нурсийский чудотворче.

Кондак 8

Странен мирови показался еси, славу его, аки прах вменивый, Ангелом собеседник был еси, Венедикте, и тако лику святых сочетаешия, поющих: Аллилуиа.

Икос 8

Всему мирови молитвенник явился еси изряден и нищих заступник, реки чудес источивый; сего ради песньми потщимся ублажати тя, преподобне:

Радуйся, яко усердно за ны Бога молиши.

Радуйся, яко из тьмы неразумия изымаеши.

Радуйся, сосуде непреложных правды.

Радуйся, свитче благодати Христовы.

Радуйся, доброе миру благоухание.

Радуйся, пречудное молитвы кадило.

Радуйся, винограде райского насаждения.

Радуйся, класе обильной нивы Божией.

Радуйся, лучу, тьму отсекающий.

Радуйся, лампадо любви неугасимыя.

Радуйся, яко тобою узы уныния духовного спадают.

Радуйся, яко тобою богомудрии веселятся.

Радуйся, Венедикте, Нурсийский чудотворче.

Кондак 9

Всякую тварь узрел еси, в лучи едином сияющу, во изступлении быв, и душу сестры твоея преподобных Схоластики в виде голубине восходящу горе и поющу: Аллилуиа.

Икос 9

Ветия многообразныя како изчислити можно
сумудренным помыслом, отче, твоего
преставления, яко уснул еси, пребогатый,
успением блаженным, предстоя во храме
Господу твоему. Сему чудящися, дерзаем пети ти
сице:

Радуйся, яко Господа твоего узрел еси.

радуйся, яко чудес Его исполнился еси.

Радуйся, яко путь показуеши в горняя.

Радуйся, яко милости подаеши, щедре.

Радуйся, яко лествица показался еси
неуклонная.

Радуйся, яко кладязь еси мудрости небесныя.

Радуйся, яко цевница еси Духа Свята.

радуйся, яко благодати стамна еси золотая.

Радуйся, в смирение Христово оболкийся.

Радуйся, славою Его увенчавыйся.

Радуйся, яко тобою благодать Спаса нашего
восприемлем.

Радуйся, яко тобою терпением Его увязуемся.

Радуйся, Венедикте, Нурсийский чудотворче.

Кондак 10

Спасения врази многажды приидоша на тя и на братию твою, скрежетанием зубным и лаянием ярость показуюше; ты же яко дым без вести сих сотворил еси, не ведущих пети: Аллилуиа.

Икос 10

Стена заступления еси, хвалящему день и ночь Господа стаду твоему, отче Венедикте, мощи твоя имущему, источающия богато чудес реки и непрестанно направляющия стопы, поющих сице:

Радуйся, всеблаженне, аки Ангел на земли явивыйся.

радуйся, предивне, монахов множество, яко птиц небесных собравый.

Радуйся, кипарисе мироуханный на земли возросший.

Радуйся, озлобления от многих приявший.

Радуйся, яко елень палимый на источники к Богу потекий.

радуйся, силою Христовою дивен явивыйся.

Радуйся, разум непрелестен стяжавый.

Радуйся, милосердия реку источивый.

Радуйся, нищету духовную возлюбивый.

радуйся, богатство непреходящее на небеси собравый.

Радуйся, на высоту востекий добродетелей.

радуйся, имея выну милости свещу возженную.

Радуйся, Венедикте, Нурсийский чудотворче.

Кондак 11

Поющим ти благодати силу показавый, словесныя зари нам облистая, Троицы дом явивыйся, немудрыя умудряя, вопиющия со смирением: Аллилуиа.

Икос 11

Светоявлением богатства горняго исполнен, преставился еси к вышнему граду, богомудре отче Венедикте, и ныне предстоиши Христу радуясь; темже и мы, недостойнии, песньми память твою хвалим зовуще:

Радуйся, человече Божий, мужу желаний райских.

Радуйся, яко тобою почерпаем источника
благодатнаго.

Радуйся, ветхия мудрования отложивый.

Радуйся, Духа Святаго утешение подающий.

Радуйся, ничтоже паче любви Христовы
изволивый.

Радуйся, яко во плоти ходя, видел еси горняя.

Радуйся, хранение выну устом твоим
положивый.

Радуйся, поющих тя к любви Божией
возводящий.

Радуйся, слезами пустыню оросивый.

Радуйся, ю вельми процветшую узревший.

Радуйся, в пучине озлобления сущих
изымающий.

Радуйся, по стезям правды водителю верный.

Радуйся, Венедикте, Нурсийский чудотворче.

Кондак 12

Благости Божией, яко сот пчельный меда
исполнен, праведности предуготовал еси
обитель, приемля с любовию монахов чины,
поющих верно: Аллилуиа.

Икос 12

Пение всеумиленное, яко малое приношение прими, отче пречудне Венедикте, от уст грешных: ничесоже бо достойнаго сотворихом, но уповающе на Спаса, дающаго ти благодать милосердно воздвигати недостойныя, зовем ти:

Радуйся, огнем печали твоей на земли радость небесную стяжавый.

Радуйся, водою слез твоих преобильный дар целений обретший.

Радуйся, яко в смирении твоем сила Божия совершися.

Радуйся, яко пламенем чистоты твоя пламень греховный побеждается.

Радуйся, яко свеща светом мудрости горней просиявый.

Радуйся, ум твой в пучину смирения погруживый.

Радуйся, подвижниче, безмолвие возлюбивый.

Радуйся, отче, пшеницею словесною чада твоя питаваый.

Радуйся, Царствия Божия полноту стяжавый.

Радуйся, утешение богатное скорбящим подающий.

Радуйся, на камени любви Христовыя житие твое утвердивый.

Радуйся, в вертограде Церкви цветы благоуханныя возрадивый.

Радуйся, Венедикте, Нурсийский чудотворче.

Кондак 13

О преблаженне отче Венедикте, ничтоже на земли восхотел еси паче любви Христовы! Темже и в вышния обители вселивыйся, яко со дерзновением ныне предстоиши Богу, за ны недостойныя молися, да любовью горе вперяеми с тобою вкупе поем: Аллилуиа.

(Этот кондак читается трижды, затем икос 1 и кондак 1)

Молитва

О преблаженне авво Венедикте! Подвигом добрым подвизався на земли, восприял еси на небесех венец правды, егоже уготовал есть Господь всем любящим Его. Темже взирающе на святей твой образ, радуемся о преславнем скончании жительства твоего и чтим святую

память твою. Ты же, предстоя престолу Божию, прими сию похвальную песнь, тебе любовию и верою приносимую, и милостивно приклонься с небесных высот, яко отец чадолюбивейший, ходатайствуй верою и любовию тя почитающим грехов прощение, жития исправление, кончину христианскую, мирну и ненаветну от духов злобы, и предстани тогда, о отче, прогоняя страх смертный от верных твоих рабов, безбедно творя разлучение души от тела, да невозбранно преидем от земли на небо, от мытарств же горьких и от вечныя муки да избавимся, и Небеснаго Царствия наследницы да будем со всеми праведными, от века угодившими Господу нашему Иисусу Христу, Емуже подобает всякая слава, честь и поклонение, со Безначальным Его Отцем, и с Пресвятым и Благим и Животворящим Его Духом, ныне и присно и во веки веков. Аминь.

